

Saantiaaocha

letoi

**Jesocurisito esenetaeraauru
rai Saantiaao letono quiricha**

1 ¹Canuna Saantiaao neeun Cana Coaunera ere tonoraera neein, calaohi Jesocurisito naaojoain ere tonoraeraneeyinne neeun. Nii Cana Coaunera Calaohi Jesocurisito ere esenetaain nenacaauru, caa cana rai chauratane sacutaain riaaneeyin nenacaauru raina, caa quiricha letohaun.

²Aonacuche satiin Cana Coaunera Calaohi coreniha canejeraauru. Chatohaneeyin nihanatiin inara tera nihane chaque tonajelanaala raotojoeeyin rachoojoeeyin neeuche.

³⁻⁴Cana Coaunera esenetaaichene coreniha itolereque coujunojoinequichene coitucuhin, nelararajiaain itolere necairichanaa abaantaain neeuche. Nitohanihane banate itolere necairichanaa nihanatiin abaantana naineriquicheeyin aina iiquichene. Nii banate esinaae rauhijiriin Cana Coaunera jerenohi ichana naineriquicheeyin. Aihute coujurihu Jesocurisito ere tonoraera neeyin nena tocohaneeeyin neeiche rauhijiriin.

⁵Inaraacha chanenu coitucuheneeyichene, Cana Coaunera caje bajaauchoete inara coroatajanemiin. Acate inara rai

coitucuhichene jaanu tereeyin, Cana Coaunera canaacha latei tera ne chaque tonajelanaala. ⁶Cana Coaunera bajaauchoene, esinae rauhijiriin esenetaain necoatoelanaala bajaauchoe. Necoatiin Cana Coaunera bajaerate, esinaae rauhijiriin Jesocurisito ere tonorana nainene, cajianeeeyin suujua letono sacuhane. ⁷Nitohaneeyin neeichene, inara coroatajanena nainerihei Cana Coaunera esenetaeneeyichene, ⁸leiniincha que suujua cuaain nena naine niha nitohaneeyin nenacaauru cachaaurune jaun.

⁹Cairichaneeyin neeichene jana, inara raa Cana Coaunerana jaun, raotojoeeyin rachoojoeeyin neeuche. ¹⁰⁻¹¹Cana Coaunera coitucuhin esenetaera coriquihona neeyin nihane, coriqui que nanejiaane niha natiin raotojoeeyin rachoojoeeyin neeyine, Cana Coauneraacha tenojoin amuritoheriin jataaen nelatena naineniha coriquine coitucuhin. Cana rai Cana Coauneraacha tei ichaonaa laen, chaaelai janonaa bana nitajenaa nainihei. Nii coitucuhin raotojoeeyin rachoojoeeyin neeyine.

**Chabana nitajenaachara ichaonaa
terichaain Cana Coaunerane**

¹²Nerausiaaequiche esinaae necairichanaa abaantaain Cana Coaunera coitucuhin, esenetaain, jereeyin, nere

tonoraain neeichenete, chabana nitajenaa charanejeein nenea ichaonaa caohacha esine tereein inara rai Cana Coaunera, belaa'in nere tonoraeraauru rai nitohane'in tihane caina aitiin nihalune jaun.

¹³Chunei chatohanei baaso ichana coacuhin nihane, coaa "Cana Coaunerate jere caa baaso coaucaunne caina," naain iriha. Coatiha joaere'in cacha rijijjeein chabaaso coacuhin nihei Cana Coaunera.

¹⁴Nii cana raajenihane canaacha coacuite, ecocoe cana suujua caje baasoneein. Aihana jaun baasoneein sacuichechene coataa, caohachaa'in coaracuche.

¹⁵Baasoacha coacuhin nenaate, nechujataaen caohacha nainejeein nitajiha cureein. Coatiha Cana Coaunera jerihane jaun, nii baaso neein ichaoheechene. Niheichu nii nitajiha chuneine jerihe'i Cana Coaunera.

¹⁶Coaa inara raajenihane nohanihache canejeraauru. ¹⁷Coatiha Cana Coaunera caje uhi chabaaso. Coatiha chaaelajanonaa bana suujua lonaai Cana Coaunera. Leinjiin acaachate aca neein ne. Itolere neeincha caohacha nejesinaachate uhe Cana Coaunera caje. Acate itolere rai cono neein ne. Aca techu enoto, atene, arasijie, naaojoainunri coaunaelu dedeeu. Chabana coreenrai Cana Coaunera. ¹⁸Nii jaunte nere berate cana rai, aonaain, coitucuhin, esenetaain tonoraacachene caina. Nii jaunte, nere esenetaain tonoraacachene jaun, ichaonaa esine tee cana rai, raotojoe'in Cana Coaunera nihane coroaeejin niicha jerei ichacaachene caina.

¹⁹Nii coreniha canejeraauru, caohachaa'in rauhijiriin esinaae Cana Coaunera ere aonaain, Cana Coaunera ere tonoraache, chaaenchu erenacaotelanaala, chaaenchu joaere'in coreniha obaje lanaala, naaonjoaain. ²⁰Joaere'in coreniha obaje cacha, nihei Cana

Coauneraacha jerenohi ichaai. ²¹Aihana jaun itolere baaso nejesina inaraacha sacui jianecuche. Nii Cana Coaunera ere, inara suujua cuhane inaraacha rucujuei Cana Coaunera ere tonoraache, caohachaa'in inara suujua coaraain. Acate osa caje jianacoo inara suujue mitareein.

²²Cana Coaunera ere coitucuhin neeichene jaun, tonoraain Cana Coaunera jerenocha sacuuche. Aineeichene nelatihei raujiaain aonaquichene. Niite nechujataaen inara raajenihane necoritariquicheein. ²³Cha teeinti Cana Coaunera ere beebejiha beebejerane aonaa natiin tonoraene. ²⁴Niite enaaicha Cana Coaunera ere baitereein. ²⁵Cha teeinti aitoa Cana Coaunera erene baitelanaala rauhijiriin tonoraain ne, niite raotojoe'in nereein. Cana Coaunera ere tonoraacachenete nainichaache caohachaa'in ichaohachene. Niicha jerenohicha ichacaachenete caohachae. Nii jaun Cana Coaunera ere tonoraain naitoonjoan ichajeein sacuhachenete caohachae, cana aina niha caohachaa'in Cana Coaunerane raotojoe'in ichaohacachene caina.

²⁶"Aitoa Cana Coaunerane rijijjeeina caohachaa'in rauhijiriin neeun," naa natiin joaenreein baaso neein leeocho cacha que irihanete raajenihane necoritae. ²⁷Chalatein neeuruha ujuatejeeurune coroataja-neein, chalatein niha autanaaurune coroatajane'in nihacanete, esinaae rauhijiriin aitoa Cana Coaunerane rijijjeein nerichaacheein. Nainihe'i Cana Coaunera Calao'hi Jesocurisito coitucuruhi rijijjeein nihacachene.

Nejelauneein leeocho cacha coaana naineniha cachane

2 ¹Nitohanihane jaun Cana Coaunera Calao'hi Jesocurisito esenetaera neein neeichene jaun, jiaonriha nejelauneein chunei coaraain neeichene. ²Ita

taojiaain Cana Coaunera bajaachene jaan coloheri- Teenforo asaae ita taojiaachene jana, enoha leinjiin coriquihona, oro que anichoquiin, cajione caohacha que necoreeteeine jana, cajione siri ruhecaain enoha cairichaiineein nenaane, ³nii oro que anichoquiin cajione caohacha ruhacaera belaaain, rori caohacha choaae lauriaain, nii cairichai cacha rai, “Nihu chujuhecoo. Ainihane nihu atanichoaee nelaurihau,” naaichenete, ⁴baaso ichariquicheein, caohachaaain cairichai belaaain coaraeneeichene. Nii coriquihona belaaichene rijijieein, cairichaihuru belailanaala, “Nelatihei cairichaihuru belaihaane,” naaichene jaun. Satiin coriquihona, cairichai, naajoainunri belaihaanete caohachae. Nihei cana belaihuruha caohachaaaine jerena caaun nihei. Nitohanai ichaqui-chenete baaso ichariquicheein.

⁵Caohachaaain aonacuchena inara rai caa que aite te coitucuhiche. Nere esenetaain tonoraa cairichaiineein nena cacha netejian, nenacaaen belaaain coroatajane Cana Coaunera, jeelai amuritoheriin esenetaain tonoraain nihane coina. Cairichaiineein caa cana rai chauratane que nihane niha natiinte, belaaain coroatajane Cana Coaunera, aitothane tocohaneein chaaelai janonaa bana satonoelanaala aina nihane coina. ⁶Nete inara, cairichaihuru necoejechanuhin neeiche. Coatiha cairichaihuru, inara necoejechanuhi, inara cairichaiiriin neeuruhi chaaelai janonaa bana. Coriquihonaaurutejian, inara necoejechanuhiriin, inara cairichaaeriin neeure. Cunaajereneeichene niha natiin, inara tararaain inara amaaain cocoaina nacaihuru rai inara teeure, caseteconeein neeichene coina. ⁷Chaaen techu inara que baasoneein ereein neeure, Cana Coaunera Calaohi Jesocurisito

sacuhin neeichene coreniha. Caohachaaain inara belaihuruhaane coaraelanaalate inaraacha acaauru belaaiche, cairichaihuru belaaichene amurijiriin. Coaa nitohaneein nihache.

⁸Quiricha cuhane aitoaha Cana Coaunerane tocohaneein, charijieein teeinti nii raotojoein ichaonaa jereein neeiche. Nii rijijieein raotojoein ichaonaa nainecuruha acaauru netonaine coina, nii leeocho cachaauru coroatajanecuchete, acaauru netonai raotojoein ichaonaa nainecurumiin. Nitohaneein neeichenete esinaae rauhijiriin Cana Coaunera aitojoan ichariquicheein. ⁹Inara araachuruhacha caohachaaain coaraain belaaain, coroatajanein, nii nejelaauru coroatajanena jereneeichenete osa que nesarureeicheein, Cana Coaunera notaracaa aitoaha Cana Coaunerane tonoraelanaala, nitohanein rauhijiriin ichaeneeichene.

¹⁰Cana Coaunera aitoonjoan tonoracache neniha natiin, jitariin caohacha nainejeein Cana Coaunera aitoonjoan tonoraenihacachenete, cana nii ujuihonnein nerichaacheein. ¹¹Nabana nitohanein neeichene coataa: “Jiaonriha chu chaaen nejelau ene, inara sinijerane lanaala nena aina naosatein neeichene. Chaaen techu jiaonriha sinijera nelanaala nena quicha aina naosatein niha enene,” nae Cana Coaunera. Chaen techu, “Jiaonriha sonajaain jaohine,” nae Cana Coaunera. Aihane jaun rai sinijeranelanaala nena aina ichoanihane nihanaatiin sonajaain jaohanete, Cana Coaunera rai rauhi tonoraenihane jaun aicheein. ¹²Aihana jaun coa nejelauneein chunei coaraain nihache. Cairichaiineein nihacachene sajainejeein, cana belaaain cana raa Cana Coaunerana jaun jerichanejeein belaaain cacha coaraain nihacachenete caohachae. ¹³Inae ecu

tihane banate caseteco coaraa cuurureein nechú ansaineein nenacaauru, necairichanacaauru que “cairichaaajoaa” naelanaala nenacaauru. Necairichanacaauru coroatajanena jeriheichurute, “cairichaaajoaa” naelanaala casetecae-ratiha cureein Cana Coaunera. Jana, necairicha nacaauru que, “cairichaaajoaa” naain coroatajaneraaurute, caseteco caje nichotiha cuurureein. Niite belaaín raa cureein Cana Coaunera.

Cana Coaunera coitucuhin esnetaane coaratihá cachane

¹⁴Cana Coaunera coreniha canejeraauru, chaque nelatihei raujiaain Cana Coaunera coitucuhin esenetaerani-chaaun naain iriha cachane. Coatiha nii coreniha osa caje jianacoon nerianaain jeriha Cana Coaunerane rijijieein cha lateein niha namute cachane belaaín coaraaín coroatajaneein netiín naitonone nihane jaun. ¹⁵Lenone, cajione, naajoain que, anejiín niha, Jesocurisito coreniha cana nejera, cana bai naajoain ine jana, ¹⁶“Cairichaaajoaa nohane, bajiaa nachuhinti chunijihu lenone, cajione, naajoain eruujue ne,” naaca cha telanaalane, nihei cairichai coroatajanihaaca. Niicha laatei tein coroatajanichaa nete caohachae. ¹⁷“Cana Coaunera coitucuhánu,” naaichene jaun esinaae Cana Coaunera coitucueraneein neeichene, leeochoauru notaaquiche nete caohachae. Jana leeochoauru notajaelanaala, raujiaain esenetaaichene chaque nelateein nedariheeeichéen.

¹⁸Inasina caohacha ichaain cacha notajaenihane, “Esinaete chuhisi Cana Coaunera coitucuhin esenetaera ne,” naain coitucuurre cachaauru. Jana esinaae rauhijiriín Cana Coaunera

coitucuhin esenetaera nihanete, quiricha cuhane aitoa Cana Coaunerane rijijieein ichaa cachane laaen esenetana nainichaache. ¹⁹“Cana Coaunera coitucuhánu canu,” naa chuneine, caohacharia níqui Cana Coaunera esenetaane níqui, nete nechú aansai ataibinaaecuru coitucuchuhichuru niha natiín, niha Cana Coaunerane esenetaain que casihure nere tonoraurenihane coreniha, acaauru casetecarihani Cana Coaunerane coitucuuruhané jaun. ²⁰Niicha jerei ichaelanaala, raujiaain esenetaa cachane rarihaain Cana Coaunera. Tana nii coitucuhin neeichene.

²¹⁻²³Coaraauna chuhinti nii coitucuhichene tocohaneein, nihei leinjiinejeein canaanai sirilanaala biinaa niha Abaraaunne jana jetaote, “Inae nerichaaín ichai leinjiín canaanaicha,” naa Cana Coaunerane jana, esenetaa Abaraaunne jaun, laenaeratelú quiricha inoaesi cuhane Cana Coaunera. Nitohaneein Cana Coaunera esenetaa Abaraaunne jaunte, caohachaaín rae Cana Coaunera. Nii baihate Abaraaun coujuhin coarae Cana Coaunera, nechú jataaen coujuha, “Carai nii acaihanejein leinjiín nenaá ichalabi Isaca uhaain, sohin mocoo carai,” naa Abaraaun rai Cana Coaunerane jana, nere tonoraain calaohi sohin jaohane coina, inae anojóan mucuha Abaraaunne jana: “Ichalabi sohin jaohine coataa, caa carenero soora. Coa canaanai sohin jaohara. Esinaete chuhisi quesenetaain quere tonorana jereena jaunte, caohacha ichaaicha,” nae Abaraaun rai Cana Coaunera. Nitohaniha Abaraaunne jaunte Cana Coaunera belachaneein Abaraaun curuaateure satiín cana inoaesihuru.

²⁴Jerichanejeein techu coitucuhin, nere tonoraain, caohacha ichaain nenacaauru rae Cana Coaunera. Coatiha

raujiaain esenetaaneecha coreniha nihei.

²⁵Charijieein teeinti ai leinjiin ene-Raba neein curuajaain nenea, jaurihanejeein jaelorohe neein nihane jianein, esinae Cana Coaunera coitucuhin esenetaane jaun, coroatajaniha Cana Coaunerane que tonajelanaala, nihei chaque casilanaala Jericoo turuuruha coroatajai Israeli cocoaichacurune jana, coitucuriin arinajaauruha sohin jaonajaauruhane coina Raba araichurune jana, acaauru coasilanaala nii coroatajai Israeli cocoaichacuru asi loreri asaae tein Raba, sohin jaonajaauruha Jerico cocoaichacuru Cana Coaunera coitucuuruhine coataa ichoteratenajae.

Nitohaneein caohacha icharate belaa in rae Cana Coaunera. ²⁶Esinaae rauhijiriin Cana Coaunera esenetaerate, nere tonoraain naitoonjoan ichaa in ne. Jana “Cana Coaunera coitucuhane,” naain iriha natiin Cana Coaunera jerenohi ichaelanaala nenaate Cana Coaunera coitucue. Nitohaneein niha cachane coatih a ichaonaa chabana sanaacharanejeein nenea ranaa nainerinaain.

Caaintaeniha baaso que iriha cachene

3 ¹Cana Coaunera ere benaa que cacha relaera neein nenea jeriquichene caohachaa in aonacuche. Nelatihei joareein cacha, caohachaa in suujua coarae lanaala Cana Coaunera ere benaa que arajiin enonaa jerihane. Niite nere aohanraauru ichoaee jaecotojoeiriin caseteco coaraa cureein, nii cacha rai beebejihane rijijieein Cana Coaunera ere tonoraenihane.

²Inaaojoan saneein chaainti Cana Coaunera rai baaso que nesarucuaache satiin. Chaen techu inaaojoan saneein chaainti baaso que irihacache, jereniha-

cache neniha natiin. Nihei caaintiaai baaso que irihacachene. Chateeinti tonaain baaso que ere. Niite itolere neein caohachaa in ichaonaa naine.

³Aonacuche. Tasinojoaan cabario natiinte nujuae cuhane coata laaojoiri tein, que raujiaeraujiajeein jerichaane jaan jelon rauhijiriin amaaca. ⁴Jerichanejeein techu timoon laaojoiri que, jerihanajaan jelon raujiaeraujiajeein rauhijiriin bote seejoan niha natiin amae timoon inaera. ⁵⁻⁶Charijieein teeinti ocoana mocohaca fosocoro busi laaojoiri quene, nii fosocoro busi laaojoiri caje necoaunaain tabaain neleereein, jitariin ocoana mocohe nii usi. Nii rijijieein techu chatohaneein, cacha cunaitaain cacha itajenaa nainere baasoneein cana ujuae caje mitunaa cana ere, chatonaain, cacha inauhene cunaain cacha janoriteein nihaca ne. Moconajaerate nii que cana saruhin ne, nitohaneein usi tabai que cacha saruera-nihane jaun.

⁷Caaintatohane sainejeeinte, itolere nunaana nenacaauru, itolere tajaecuru, itolere atanichoaee teerei cana lenone, itolere ataibinae, janolari, acano, itolere acauhana nenacaauru, taji, itolere cautenu rijihuru irilaare irilaeraauru. ⁸Nete chunei, rai nere baaso jianein nenea nainene. Charijieein teeinti cacha calaa acanone nii acano catu caje cuhin, nii cacha coichana lomoha nii acano catu corane, ohe nii acanoacha calai. Nii rijijia cana suujua baaso caje coauneein, cana ujuae caje mitunaa cana ere, leeochoauru cana laurijiracuru, naaojoainunri jitariin aasaecane jaun.

⁹Nii jeelai cana suujua baaso, cana ujuae caje mitunaa Cana Inaca Cana Coaunera coroaecaachene jaan quete rijijieein niicha coananajoineein nihane baiteein, “Cha quete nelatere caa

cacha,” naain irihacache obajeein cacha aina nererojoecaacachene, “Coaraain nainaaaine caa aansai,” naain irihacache, coaraain cuu necairichaane coina, chatohaneein necairichaa cachane coaracaachene. ¹⁰Nii jeelai cana ujuae caje mitunaa quete, Cana Coaunera coroaecaachene jaan que techu cachaauru cotaihacache. Caohachaa i nitohaneein nihacachene, canejeaauru.

¹¹Charijjeein teenti le curuhacha caje mitunaa nainene acau ichonai, acau elonai, naajoain. Nii rijijjeein techu cana suujua cuhane nefaa baasone, erenaa caohacha que erenaa naineniha-cache.

¹²Charijjeei teenti leeocho enua inaaque inaana nainene *iquera*, nihechu acau cotebei nihana natiin ichonainein nerotona nainihe. Nirijjeein techu caohacha que erenaa nainene cacha, baasoneein niha rai suujuane.

Cana Coaunera coitucuhane coaratihia cachane

¹³Esinaae rauhijiriin Cana Coaunera jerenohi coitucuhin neeichene, inara suujua coaraain, leeocho cachaauru rai caohacha ichaain, itolereneein caohachaa in raotojoeiin neeuchete, esinaae rauhijiriin Cana Coaunera jerenohi ichana coitucuhichene coaracurumiin cachaauru. ¹⁴Jana inara leeochoaauru que necoelaain, inara suujua cuhane obajeein, inaraacha jerei ichaquichene, “Cana Coaunera coitucuera nihanu,” naain coa raotiin nena coaucache. Niite laen nohanenaa ne, Cana Coaunera esenetae-nihana jaun. ¹⁵Nitohaneein neeichenete Cana Coaunera coitucuruhi cachaauru rijiiiriquicheein. Acaaurute nitohaneein coaacure, nitohaneein acaauru suujua tiha Moconajaerane jaun. Nihei leeochoaauru cachaauru aina, ita belaiha

cachane jerihei Moconajaera. Moconajaerate ita belai lanaala, itaque nejeratiha cachane jere. ¹⁶Nenainetiin rai caohachanuhacha que coacuhin nenacaauru cachaaurute, ita que nererojoecaain, ita que necoelaain naajojoauruhane jaun, nainecurene ita belaa in leeochoaauru cachaauru aina caohachaa in nena nainecurene. ¹⁷Nii Cana Coaunera coitucuhin nenacaaurute, nejelauneein caohachaa in ichaaore. Cana Coaunera ere tonoraauruhana jaunte, caohachaa in ichaaore, rai caohachanuhacha que coaacu-ruhane jianein, leeochoaauru belaa in, ita belaa in, ita que nererojoecaelanaala, inae nohanelanaala, leeochoaauru corotajanein, cha latiha leeochoaurune tein, suujua coaraain, naajojoain neeuruhana jaun. ¹⁸Nitohanein neeichenete, Cana Coaunera jerenohi ichaaechajeein, nauruta nauruta in cuujeein, jelai choaae jauhecotojoeriin caohachaa in ichaohichene, ita aina, leeochoaauru, naajojoainunri ainane coaraanete, raotojoeiin nereein inara aina Cana Coaunera. Acate inara suujua cuhane raoti ichaonaa esine tereein, rachoojoeiin neeichene coina. Nitohanein raoti ichaonaa esine que ichaohichene, coaracuruha leeochoaauru nete, acaauru netonai nii inara rai raotojoeiin ichaohichene jaan ichaonaa esine teera Cana Coaunera, ere tonorana jerecureein.

Caa chauratane que nena baasohacha jereein sacuha cachane

4 ¹Nitohanein Cana Coaunera jerenohicha, ichana coacuhincha ichae lanaala, inaraacha jereeicha coaaquichene jaunte, ita que nejeratein, ita que nererojoecaain neeiche, leeochoaauru aina ita belaa in neeichene jeriha Cana Coaunerane niha

natiin. ²Cha teeinti chaaelai sirihane jana, inara rai nenihane que necohe-laain, nii niicha sirii rucuhene coreniha que nererojoecaain cotaain, coaraain inae nii niicha sirii basijiauhichene jana tonaa nii nerorane, inae coreniha sonaa coacuhin que nererojoecaain, tabaque sohin jaohin, naaojoaainche, cha lateein neeichene Cana Coaunera caje bajaela-naala. ³Tabaque bajaachene niha natiin inara rai terihaain Cana Coaunera, niicha jerei ichana coacue lanaala leinjiin inara raihuancha que bajaachene.

⁴Cana Coaunera coitucuruhi cachaauru. Tana caa chauratane que nenaacha jereein sacuera cacha, Cana Coaunera que nejeratenaa neein nihane coitucuhichene. Aihane jaun chunocoha caa chauratane que nenacaauru jereein Cana Coaunera aitoonjoan que jaolequiin nenaate Cana Coaunera que nejeratiha aicheein. ⁵Nii que nainaqichene jaanu quete quiricha inoaesi cuhane, laenaera que laenaerateein aitoha Cana Coaunerane rijijieein, esinaae rauhijiriin aitohane rijijieein inetono janonaa bana inara suujua letonohacha ichana jerequiche. ⁶Nete jataain cana belaihane jaun, itolere janonaa bana cana coroatajane Cana Coaunera, rai Quiricha Inoaensi cuhane aitohane tocohaneinte que ninichaa-jenaa tocohaneein rai baaso icharaaauru que nejerate Cana Coaunera. Jana esinae rauhijiriin esenetaain nere tonoraaraaurute belaiin coroatajane Cana Coaunera. ⁷Nitohanihana jaun nelararajiaauche, Cana Coaunera ere tonorana que. Atiin nii Moconajaera sitaachete inara caje amuhine. ⁸Aihana jaun, Cana Coaunera rai caohacha rene nichuuntaain Cana Coaunera jerenohicha ichajein ichaaoche. Aihute inara rohan neeine Cana Coaunera.

Enate ichaonaa baaso que ichaohiche. Nii jaun Cana Coaunera bajaauche. Aihute inara suujua rucujueein, baasoneein neeichene caje jianacoo inara mitaain, inara coroatajanemiin Cana Coaunera. Aihute nii baaso ichaquichene jianein itolere bana Cana Coaunera jerenohicha ichaquiche. Aihana jaun cajihanein inara suujua coaraquichene jianecuche. Coaa cajihanein inara suujua coaracache. ⁹⁻¹⁰Cana Coaunera jerenohi ichaquichene jianein neeichene coejein, inara jaberoco coinaderaain, baaso ichaain neeichene coitucuhin, rauhijiriin suujuelanaala been Cana Coaunera bajaauche. Bajaachenete inara coroatajanerein jeelai choaae jauhecotojoeiin Cana Coaunera.

Cunaain nejera coacuhin niha cachane

¹¹⁻¹²Canejeraaauru jiaonriha cunaain ita coacuhin, ita janoriteein neeichene. Chunei Cana Coaunera coreniha rai nejera inauhene nejeratein nenaate Cana Coaunera rai baaso ichareein. Inasiina Cana Coaunera colaihaje tacaain nejelaauru ichao coaraain, “Acate naaojoaain ichoae,” naain coulurujera rijitiin ereriquiche. Leinjiin Cana Coaunerate laen, chatohanein baaso ichaain, caohacha ichaain, naaonjoaain ichaonacaaauru coaraain, nii que, “Acaauru acaaurute, naaojoaain jataaen baaso ichaechajein ichaaoe,” Jana, “Acaauru acaaurute laen caohachaaain suujua coaraain caohachaaain ichaaoe,” naain cacha ichao coitucuhin que erenaa naine. Aitoha quiricha cuhane Cana Coaunerane tonorae lanaala, leeochoaauru ichao coaraain coulurujuera rijitiin ereichenete, chatohanein inara itajein, chatohanein inara tenaa nainerein Cana Coaunera. Aca techu

chaen naine, jianacoo baasoneein
neeichene caje inara mitaane.

**“Naaajoanrichaain eresi,” naain
coitucueniha cachane**

¹³Tabaaaurute, “Naaajoain neseuna
cureeunni, cuu amihanenaa que
necoreteein coriqui taojiaa,” naaure.
Caohachaai nitohanein coauquichene.
¹⁴Niheichu, “Naaajoanrichaain eresi,”
naain coitucuheehiche. Inoaelu
netojoein inoo tejian ichaoriquicheine
coitucuhiche. Tana janoneecha mituhin
nii baiha nitajiha suruaa neeojoaine
rijjiicha inara ichaone coitucuhichene.
¹⁵Raujiaaincha caohachaain
coaaucuche. “Cana Coaunera jerihanena
ichaaojoihanune caa ichaain, leeocho
ichaain, naajoanreeunni,” naauche.
¹⁶Nii inatiinte chaelai nihane coasitaain
ereeiche. Caohachaai niritiin irihacane.
¹⁷Cana Coaunera jerenohi coitucuha-
cache natiin, nii canaacha coitucuhi
caohachaain ichaenihacache nete osa
tabai que nesarurihacacheein.

**Caseteco coaracuururichaain
cairichaihuru cairichaurera
coriquihonaaurune**

5 ¹Aonacuche satiin coriquihona
neen nenacauru, nii que caoha-
chaain casiin neeichene coina. Tabai
inaderanaa caaunte chanaa curiqui-
cheein, ecu tihane bana necairichaa
curiquicheeina jaun. Satiin nii inara
coriqui aina caohacha nainejeein
nitajeeichene coina, tururichaa in Cana
Coaunera jaun. ²Inara coriquihona
neeichenete arajiin coriqui jaohiche,
leinjiin inaraacha latei corenihacha.
Nihei chaque nelaterinaain nii
inaraacha sirii rucuhele. Nii inaraacha
rucujuei rucuhele nacodohaqui, nii
inara coriqui, inara cajione, inara
lenone nacodohaqui, nechui inacojoein

nelaterinaain, cororoneein setuhin
naajoanrichaaine jaun, chaen
quirichaa in cojoanone jaun. ³Coriqui
niha natiinte, caohatiin rucuhequichene
niha natiin nitajiha cureein.

Inae saa cana janonaane banate satiin
baaso icharaauru itajeratereein usi tabai
que Cana Coaunera. Nii banate, nii
nacododojoanei acaauruhacha rucujuei
rucuhele, chabana latein neeuruha
cairichainein nenacaurune, acaauru
coroatajanein, naajoaunrenihane
coaraane jaun, nii coreniha coriquiho-
nanein nenacauru casetecareein Cana
Coaunera. ⁴Nitohanein cairichaihuru
cairichaaauru acaauru amihaneeo
corete lanaalanete rautaene jataain
Cana Coaunera. Cana Coaunera jana,
nii cairichaihuru cachaaauru cairichae-
riin neeuruha coriquihona neen
nenacaurune coaraje. Nihei chaen
aohana jerecuruhi rai namihaneon
coreniha aitucuruha cachaaaurune. Cana
Coaunera laen aitocuruha cairichaihu-
rune aonaje.

⁵Satonote raotojoein caa chaura-
tane que ichaohiche, itolere inaraacha
latei que nerujueleteein, nete inae nii
coreniha inara que, nii core coaratihane
cureein Cana Coaunera inae cuutihane
bana. ⁶Joaereein lera colane cairichai
cha coitucuruhi cachaaauru sohin
jaohin naajoaache, inara rijijieein
neeurinaauruhane jaan que airijiin. Nii
corenihate inara casetecaain, jataain
inoaelu netojoein inara cairichareein
Cana Coaunera.

**Cana Coaunera bajajeein raotojoein
cohacuruhine Cana Coaunera
coitucuurera**

⁷Nitohanein cuu tihane bana nii core
coaraterichaa in Cana Coaunera jaun
coa nererojoeacache. Nii inara
cairichaaauru aina abaantaain, turuha

Cana Coaunerane reeintiaain cohacuche. Charijijieein teeinti, nocoanajaauruhane, temule jaauruhane, omarohin nihane cohajeure, inacaain, tainacaa que turuhane taihuruhane coina. ⁸Nii rijijieein turuha Cana Coaunerane reeintiaain cohacuche. Jiaonriha Cana Coaunera ere tonorana jianiquichene. Atiin cohacuche, inae carajarinaain turuha caa cana rai chauratane que Cana Curuanaa Jesocurisitone. Nii coreniha atiin inara suujua lararajiaain, Cana Coaunera ere tonoraain sacuuche. ⁹Canejeraauru jiaonriha ita que inara suujua rohecaain ita que nejerateein neeichene. Nitohaneein neeichenete inara casetecaeratereein nii rucueraaunu que nena, nii turuha uhenenu Cana Coaunera.

¹⁰Chatohaneein necairichaaichene niha natiin, charijieein teeinti aichejete-curelu *profetacuru*, nii rijijieein neeuche. Inoaelu aitiin acaauru letohaa Cana Coaunerana jaan que, catchaauru rai ereerejeein beebejeeure, jataain necairichaaauruhane niha natiin. Nii necairichanaa abaantaain, nihei Cana Coaunera ere beebejeeuruhane jianelanaala, nii aihuruhalune rijijieein nihacachenete caohachae. ¹¹Acaaurute jataain caohatiin neeurelu Cana Coaunera aina. Coaraauna chuhinti, nii inara netonai coitucuhichene tocohaneein jetao, tabai inaderanaa que situhin nihalu Joobe ne. Nii baiha caohacha icharichaaain rai Cana Coaunerane esenetaana jaunte, nitohaneein jeelai amuritoheriin coroatajaniha Cana Coaunerana jaun, enacoauneein calaojoiin, cacunuquuin, baca siriin, caohatiin raoti ichaonaa que ichaohin nelu Joobe. Aiha Joobene rijijieein necairichanaa abaantaain, inara coroatajanerihani Cana

Coaunerane coitucuhin esenetaain neeuche.

¹²Caohachaaain aonacuchena inara rai aite. Baasoneein ichaonaa corihaaichena jaunte joanreein, “Cana Coaunerate coaraje. Acate esinae aitocooaunne coitucue,” naain esinae rijitiin nohaneeiche. Coa niritiin nohanihache inara casetecaa Cana Coaunerane coataa. “Icharichaaunni,” naain chaelai que ereeichene ichacuche. Jana, “Coatiha icharihaaunni,” naaichene coa ichacache. Jiaonrihachu chaen, “Cana Coaunerate coaraje,” naain nohanenaa coaaquichene, nabana inara casetecaa Cana Coaunerane coataa.

¹³Chatohaneein necairichajeein niha chuneine, Cana Coaunera bajaaine. Jana chunei inae raotojoein nihane, rachoojoein Cana Coaunera coroejeein nenatemiin.

¹⁴Chatohaneein cunaitiha chuneine, Cana Coaunera coitucuurera ichauhe-naauru cotihacuchete, erene que rujuaain rai Cana Coaunera bajaauruhinete, nii cunaitenaa rautaaaine Cana Coaunera.

¹⁵Esinae rauhijiriin, nii cunaitenaa rautarichaaain Cana Coaunerane esenetaain bajaauruha nete, nerautareein nii cunaitenaa. Aihute, chaen chatohaneein osa que nesaruhin nihane niha natiin, atiin que suujua acatena nainemiin Cana Coaunera. ¹⁶Nitohanihane jaun, chatohaneein baaso ichaaain osa que nesaruhin neeichene suujue lanaala ita rai beein, ita rai Cana Coaunera bajaauche jiniiquiin. Nii banate, chatohaneein baaso ichaaain osa que nesaruhin naaojoaain neeichene niha natiin, atiin inara que suujua acatena nainereein Cana Coaunera. Caohachaaain nere tonoraera caohachanejin cacha bajaa nete tonorae Cana Coaunera.

¹⁷Coaraauna chuhinti Cana Coaunera ere bera inoaei Irihasi. Cana rijijieein cacha neein niha natiin jetaote, uheniha

elone coina Cana Coaunera bajaane jana, nichata jaanaca cataaun tiaaojoaain uhene elo aansijieeinijin. ¹⁸Nii baiha coaiteen Cana Coaunera bajaa Irihasine jana jetaote, elo letoae Cana Coaunera, atane setejiaane enacooauneein omarona nainiha temulene coina.

¹⁹⁻²⁰Aonacuche, saatono neeina inara rai aitoreeunni. Chunei baaso ichaaechaejeein ichaoha Cana Coaunera baiteein inete, ohane bana cuhanete nereein necairichana jaun, cuu nitajihane coina. Nihei nitohaneein chunei casetecana jerihe Cana Coaunera niqui. Esinae Cana Coaunera esenetaera neein nena tocohaneein, nii Cana Coaunera esenetaauruhi rai ereein relaacache-

nete jere Cana Coaunera, Cana Curuaanaa Jesocurisito naaojoaain, acaauru netonai Cana Coaunera esenetaain nere tonoraaauruhane nii baaso neein neeuruhane caje roconajaa in ranajaa Cana Coaunerane coina. Chaen techu tabaauru Cana Coaunera coitucuurera, inae nere baiteein baaso ichacure. Nabana caseteco coaraa nii Cana Coaunera baiterane coataa, caohachaain aina ereein coroatajanecuchete nacoaauneein Cana Coaunera ere esenetaain tonoramiin. Nitohaneein osa que nesaruha namute cachane jana, Cana Coaunera rai caohacha que namute cacha suujua raujiaain nenaate, osa que namuritohane niha natiin que suujua acatereein Cana Coaunera.